



# Bulteno de la Londona Esperanto-Klubo

[Londonaesperantoklubo.com](http://Londonaesperantoklubo.com)

**Marto - Aprilo 2022**

## Kluba programo:

### Marto:


4. LVS: **D-ro Loêjo**: La fiziko en via poŝtelefono



11. LEK: **Yves Nevelsteen**: Vikipedio.



18. LEK: **Koufionou Koffitche**: Vivo en Togolando




25. **Jarkunsido de la Londona Esperanto-Klubo.**

### Aprilo:

1. LVS: **Klaas Dijkstra**: Ĉe la lumo de lignofajro



8. LEK: **Costantine Mashauri**: Vivo en Tanzanio.



15. **Kluboj fermitaj pro Paska Vendredo**

22. LVS: **Keyhan Saydapour**: Ĉefverko de la persa literaturo – "La florejo de Sadio".



29. LVS: **Bert Boon**: Nekonataj leteroj de Zamenhof".



## Lokoj, horaroj kaj aliaj informoj:

LEK kunvenas vendredvespere. La plejmulto de la kunvenoj estas virtualaj kaj okazas per la reta sistemo Zoom, komenciĝante je 19h (UTC). Fine de 2021, oni komencis okazigi kelkajn fizike ĉeestajn kunvenojn en la nova renkontiĝejo en Highbury. Pro la evoluo de la pandemio oni decidis, ke estas pli prudente plani la venontajn kunvenojn kiel nur interretajn. Kiam eblos okazigi kelkajn kunvenojn ankaŭ kiel ĉeestajn, la anoj estos informitaj kiel eble plej rapide.

Novaj spektuntoj de la Zoom-kunvenoj bonvolu peti ligilon al la proksim-vendreda renkontiĝo de la sekretario.  
[lek.sekretario@gmail.com](mailto:lek.sekretario@gmail.com).

Haveblas ankaŭ, ĉe Jutubo, registraĵoj de prezentoj jam okazintaj. Bonvolu viziti [mallonge.net/LEK-jutubo](https://mallonge.net/LEK-jutubo)

## Mesaĝo de la prezidanto:



Karaj LEK-anoj,

Mi skribas mian leteron sekvan tagon post la ŝtormo *Eunice*. Oni nun kalkulas damaĝon faritan per la plej severa ŝtormo en Britio dum la lastaj 30 jaroj. Alia ŝtormego - politika kaj eble milita - pendas super la tuta Eŭropo kaj neniu scias kian damaĝon ĝi faros.

Sed venas fino al ĉiuj ŝtormoj kaj post vintro venas printempo.

Ankaŭ nia klubo pretiĝas por printempa sezono. La nova programo por Marto-Aprilo promesas interesajn prelegojn pri tre diversaj temoj. Niaj instruistoj bonege laboras instruante Esperanton al homoj el diversaj landoj, ne nur Londonanoj. Homoj scias pri la agado de la klubo pli ol antaŭe dank' al nia anglalingva reta paĝo, jutuba kanalo kun registritaj prelegoj, kaj nia konstanta ĉeesto en sociaj retejoj (*Facebook* kaj *Twitter*, ĉefe en Esperanto).

Sed eble ni ne faras sufiĉe? Kion atendas niaj nov-aligintaj membroj?

Eble por nia 120-jariĝo (la 12an de Januaro 2023) ni havu pli ambician programon? Se jes, ĉu estas novaj ideoj kaj novaj aktivuloj? Ĉu iu estas tiom ambicia por kandidatiĝi kiel prezidanto de la klubo kaj gvidi la klubon dum sekvaj jaroj? Mi akceptis la postenon portempe - kaj nun feliĉe transdonos ĝin al tiu ambicia kluban(in)o. Mi daŭre okupiĝos pri la informado en sociaj retejoj ktp. (se vi elektos min kiel vic-prezidanton aŭ komitatanton).

Dum la pasinta jaro mi ofte rakontis pri la klubo al miaj amikoj kaj konatuloj, ne-esperantistoj. Ili ĉiuj miris kaj admiris, ke LEK naskiĝis en 1903 kaj daŭre funkcias, eĉ dum la tempo de la pandemio. Ja niaj retaj kunvenoj kune kun amika Antverpena klubo okazadis regule. Ĉu tio ne estas admirinda?

Eble ni bezonas rakonti pri la historio de LEK kaj la nuna agado al la ekstera mondo pli laŭte, al pli vasta publiko? Por tio ni bezonas spertan anglaparolanton kaj lertan prezentanton, ĉu ne?

Nia jarkunveno okazos jam baldaŭ - fine de Marto. Bonvolu pripensi pri la klubo: kial vi volas esti ĝia membro? Kion vi volas pli/malpli en ĝia programo? Kion roman ni povas fari por inde festi ĝian 120-jariĝon? Kaj kion ĉiu el vi povas kontribui?

Ni ankaŭ uzu Esperanton tiom ofte kiom eblas. Jen eta rememoro el mia labora vivo en la Brita Biblioteko: ĉiuj miaj kolegoj sciis ke mi estas Esperantisto, ke mi zorgas pri la Esperanta kolekto. Tamen: ĉiujfoje kiam ili **aŭdis** min paroli en Esperanto - ĉu per telefono, ĉu kun vizitanto el alia lando - ili daŭre venis demandi mire: "Ĉu vi parolis en Esperanto?" Montri, ke Esperanto **funkcias**, ke en ĝi eblas priparoli ĉiujn temojn sur nia belega planedo (kaj ne nur! Ankaŭ pri tre foraj planedoj kaj galaksioj, kiel faris Amri Wandel dum nia Februara kunveno) estas la plej bona konvinkilo por homoj dubemaj kaj skeptikaj. Ni renkontu printempon kun novaj ideoj kaj esperoj. Sanon kaj vivon en paco al ĉiuj!

Amike

**Olga Kerziouk**

## Opinio

*Kun vera amiko oni povas malkonsenti, eĉ pri afero grava, sen kolero, sen malestimo. Supozante ke anoj de LEK estas ja tiaj, ni jen prezentas disputindan opinion de forpasinta Vicprezidanto de la klubo, kaj invitas vin repliki. Lia temo estas:*

### La devoj de esperantisto

Lerninte Esperanton, kiajn devojn kaj respondecojn vi nun havas? Kion kroman vi akceptis kiel farendan, kiam vi finstudis kurson aŭ lernolibron? Kion la mondo nun postulas de vi? Kion vi nepre devas nun fari, por havi rajton sin nomi 'samideano'? Alivorte, kiom da devoj havas iu, kiu estiĝis esperantisto?

Respondo: neniom!

Fininte gimnazian kurson pri lingvo franca aŭ hispana, ĉu vi supozis, ke necesas ekdisdoni varbfoliojn, porti insignon, aĉeti librojn, aliĝi al asocio kaj partopreni en klub-kunvenoj? Certe ne! Do kial oni atendas konduton ĝuste tian de homo kiu lernis Esperanton? Tiu ja devus ĝentile danki al sia (se efika) instruisto, sed kial ion alian fari? Oni lernas lingvon, samkiel oni lernas ĉiun alian scion aŭ lerton, por ĝin ĝui aŭ utiligi, laŭ propraj cirkonstancoj kaj bontrovo.

Ĉu vi malestimas iun, kiu ne membriĝis en EAB? Aŭ alian, kiu rifuzis aniĝi al Pasporta Servo? Ĉu oni admonu konatojn, kiuj neglektas aĉeti libron ĉiujare en la naskiĝ-datreveno de Zamenhof? Ĉu tiuj, kiuj scias nenion pri ties viv-historio, pri la Delegacio, pri Pastro Cseh aŭ signifo de UEA, meritas niajn sarkasmajn mokojn? Neniel! Oni do ne faru!

Mi konas plurajn Esperanto-parolantojn kiuj uzas la lingvon pli bone kaj efike ol plej multaj subtenantoj de t.n. 'Movado'. Tamen ili obstine rifuzas aliĝi al ia ajn organizo, neniam aĉetas librojn, legas nur gazetojn hazarde kaj senkoste akiritajn. Iu sinjorino gajnis plurajn diplomojn (unu eĉ universitatan) per verkado de tezoj pri Esperanto, kaj pri kiel ŝi uzis ĝin. Alia konatino informis al flughavena pasport-kontrolisto ke ŝi vizitas Anglujojn ĉefe por praktiki kaj perfektigi sian Esperanton. Du amikoj miaj montras sur aŭto-fenestro banderolon kun vorto ESPERANTO. Tria, kiu estas membro de oratora

ekzerc-grupo, foje parolas tie pri la valoro de Esperanto. Kvara verkas rubrikojn en kiuj li ofte menciis Esperanton.

Neniu el la ĵus-menciitaj iam ajn pagas kotizon aŭ abonon. Tamen ili ja estas esperantistoj 'pli bonaj' ol multaj, kiuj laŭrutine vizitadas niajn klubojn kaj grupojn. Suferigas iujn, kiuj nur apenaŭ (aŭ eĉ tute ne) parolas la lingvon, malestimo fare de grupanoj, aŭ de membroj de EAB.

Se vi mem troviĝas inter la malestimatoj, bonvolu akcepti mian aproban bondeziron!

*Will Green (1911-2003) estis iama honora sekretario de EAB kaj vicprezidanto de LEK.*

Will estis instruisto ĉe porknaba lernejo en Leeds kaj ankaŭ fotojurnalisto. Lia entuziasmo rilate Esperanton senlimis: li havis profundajn konojn pri Esperanto kaj, kiel instruisto, lerte scipovis kapti la intereson de kursanoj.



Ankaŭ per magio li varbis por Esperanto: li estis amatora magiisto kaj kunfondinto de MIRO (Magia Internacia Rondo). Aliajn talentojn li posedis: li estis muzikisto, pentristo kaj verkisto. Almenaŭ unu poemo fariĝis kanzono (vidu la fama Kajto-kolekton *Tohuvabohuo*).

## Brita Kongreso 2022

Ĉu vi jam aliĝis al la Brita kongreso? 22-24-an de aprilo 2022, Conwy, Kimrujo  
[Britakongreso.org](http://Britakongreso.org)



## Re-membriĝu al LEK por 2022

Se vi ankoraŭ ne re-membriĝis al LEK, sciu ke tion vi povas fari facile en la interreto ĉe <https://londonaesperantoklubo.com>

## Stipendioj por novaj esperantistoj

EAB denove proponas subvenciojn por novaj esperantistoj, kiuj volas sekvi kursojn eksterlande. Financa helpo estas havebla por NASK ([esperantic.org/en/nask-2022-1](http://esperantic.org/en/nask-2022-1)), PRINTEMPaS ([gresillon.org/spip.php?Rubrique20&lang=en](http://gresillon.org/spip.php?Rubrique20&lang=en)). Informiĝu pri la kursoj ĉe tiuj retpaĝoj. Por pli da informoj pri la subvencioj, bv. kontakti EAB, ĉe [tim.owen@esperanto.org.uk](mailto:tim.owen@esperanto.org.uk)

## Londona Esperanto-klubo



### Funkciuloj

Honora Prezidanto: Prof. John Wells; Honoraj Vicprezidantoj: Heleno Fantom, Joyce Bunting. Konsilantaro: Olga Kerziouk (Prezidanto), Anthony Bodineau (Vicprezidanto), Matt Peperell (Vicprezidanto), Renato Corsetti (Sekretario kaj Programo), Arturo Prent (Kasisto), Anica Page (Registristo), Antony Rawlinson, Phil Housley, Terry Page. Maurizio Giacometto (kompilisto de la Bulteno)